

## 一一二、小兒散花供養佛緣

佛在舍衛國祇樹給孤獨園。爾時世尊將諸比丘。著衣持鉢。入城乞食。至一巷中。有一婦女。抱一小兒。在巷坐地。時彼小兒遙見世尊。心懷歡喜。從母索花。母即與買。小兒得已。持詣佛所。散於佛上。於虛空中。變成花蓋。隨佛行住。小兒見已。甚大歡喜。發大誓願。以此供養善根功德。使我來世得成正覺。過度眾生如佛無異。爾時世尊見此小兒。發是願已。佛即微笑。從其面門。出五色光。遶佛三匝。還從頂入。爾時阿難前白佛言。如來尊重。不妄有笑。以何因緣。今者微笑。唯願世尊敷演解說。佛告阿難。汝今見此小兒。以花散我。不阿難白言。唯然已見。此兒者。以花散我。於未來世。不墮惡趣。天上人中。常受快樂。過三阿僧祇劫。成佛。號曰花盛。廣度眾生。不可限量。是故笑耳。爾時諸比丘。聞佛所說。歡喜奉行。